



Data: 29 da fanadur 2013

DV915_0713_Logopaedie_nach_obl_SZ_HP.D.docx / nr. 915

DISPOSIZIUN DAL DEPARTAMENT

En connex cun l'entrada en vigur da la nova lescha davart las scolas popularas dal chantun Grischun dals 21 da mars 2012 (lescha da scola; DG 421.000) stoi vegnir sclerì co ch'i duai vegnir garantida la **logopedia per ils giuvenils suenter ch'els han terminà l'obligaziun d'ir a scola fin al mument ch'els han cumplenì il 20avel onn da vegliadetgna.**

Tenor l'art. 62 al. 1 da la constituziun federala èn ils chantuns cumpetents per ils fatgs da scola. Els procuran – tenor l'al. 3 da quest artitgel – per ina scolaziun speziala sufizienta da tut ils uffants e giuvenils impedids fin maximal a la cumplenida dal 20avel onn da vegliadetgna. La lescha chantunala da scola che entra en vigur il 1. d'avust 2013, statuescha en l'art. 43 al. 1 in dretg sin mesiras da la pedagogia speziala per scolaras e scolars che han in basegn spezial da promoziun. Tenor l'al. 2 è in basegn spezial da promoziun avant maun tar scolaras e scolars che han cumprovadamain grondas difficultads en il cumportament, en la capaciad d'emprender ed en la capaciad da prestaziun sco er en la cumpetenzza da discurrer ed en la cumpetenzza linguistica (lit. b) sco er tar scolaras e scolars ch'èn pertutgads u smanatschads d'in impediment corporal, spiertal, psichic, linguistic, sensoric u da la percepziun (lit. c). En l'al. 3 èsi fixà che las disposiziuns per scolaras e per scolars che han in basegn spezial da promoziun tenor l'al. 2 lit. a fin c valan confurm al senn er per ils uffants da la vegliadetgna pre-scolara e per ils giuvenils suenter ch'els han terminà l'obligaziun d'ir a scola fin al mument ch'els han cumplenì il 20avel onn da vegliadetgna. Tenor l'art. 47 al. 2 da la lescha da scola è il chantun cumpetent per garantir e tenor l'art. 48 al. 2 per ordinar las mesiras en il sectur pretensiusas. Tenor l'art. 44 al. 3 lit. c da la lescha da scola vala la logopedia suenter l'adempliment da l'obligaziun d'ir a scola sco ina mesira pretensiusa e tenor l'art. 44 al. 5 da l'ordinaziun tar la lescha da scola (ordinaziun da scola; DG 421.010) sco ina mesira che ha in grond basegn da promoziun.

Sin questa basa èsi chausa dal chantun da garantir la logopedia suenter l'adempliment da l'obligaziun d'ir a scola fin a la cumplenida dal 20avel onn da vegliadetgna, da garantir ina purschida correspondent e da procurar per la realisaziun da las mesiras respectivas a partir dal 1. d'avust 2013. Scleriments ch'èn vegnids fatgs entaifer ed ordaifer il departament d'educaziun, cultura e protecziun da l'ambient han mussà ch'igl

è cunvegnet da surdar al servetsch da pedagogia curativa dal Grischun (SPC) questa incumbensa. Ils contacts cun il SPC han mussà che quel è pront per quai. Uschia ston vegnir scleridas en in proxim pass las premissas professiunalas e structuralas ch'èn necessarias per ademplir las novas incumbensas e ston vegnir sclerids ils custs ch'èn da spetgar per organisar e per realisar la purschida.

1. Las premissas professiunalas

Il SPC duai da nov er esser cumpetent per la logopedia en il sector pretensius per ils giuvenils suenter ch'els han terminà l'obligaziun d'ir a scola fin al mument ch'els han cumplenì il 20avel onn da vegliadetgna. Da metter a disposiziun questa purschida tenor ils standards professiunals sco incumbensa chantunala signifitgescha cunzunt d'integrar e d'illustrar correspondentamain en il dossier da qualitat "Logopedia" dal SPC la responsabladad professiunala, l'organisaziun ed ils process dal rapport e da la dumonda per la logopedia.

Tar il SPC pon da nov star a disposiziun las logopedas regiunalas – en il rom da lur engaschament – er per garantir las incumbensas che resultan en il sector da la logopedia per ils giuvenils suenter ch'els han terminà l'obligaziun d'ir a scola fin al mument ch'els han cumplenì il 20avel onn da vegliadetgna.

Las novas incumbensas periodicas che resultan cumpiglian en spezial:

- la cussegliaziun, la diagnosa e la terapia logopedica;
- il scleriment, il rapport e la dumonda (tenor il princip dals quatter egls) a l'uffizi per la scola populara ed il sport (USS);
- la procuraziun da terapias logopedicas per giuvenils en il cas singul.

2. Las premissas structuralas

En il sector da la logopedia dispona il SPC da las premissas structuralas per garantir la purschida per il nov segment da vegliadetgna. L'USS parta dal fatg che las structuradas correspundan essenzialmain a quellas da la logopedia dal sector tempriv.

3. Ils custs

Ils custs dal SPC per la nova incumbensa vegnan calculads ord vista da l'USS tenor ils suandants criteris:

Dumber da las cussegliaziuns, dals scleriments e da las terapias:

Tenor las experientschas vertentas da l'USS vegni a dar damain cas singuls tar ils giuvenils che han ademplì l'obligaziun d'ir a scola (maximalmain 10 cas/onn), tar ils quals i vegn a resultar ina terapia sin basa d'ina disposiziun da l'USS. Las logopedas regiunalas èn – tenor las disposiziuns vertentas – involvidas gia oz en la dumonda a l'USS d'obtegnair logopedia en quest sector. Per regla collavuran ellas cun las logopedas ed ils logopedes da las instituziuns responsablas per la scola che fan en il cas singul savens il scleriment e las terapias. Ils custs da las logopedas regiunalas vegnan pia a s'augmentar minimalmain envers oz en quels cas, en ils quals ellas fan sezzas las cussegliaziuns, ils scleriments e las terapias.

Elavurar la basa per il dossier da qualitat "Logopedia":

La logopedia per ils giuvenils suenter ch'els han terminà l'obligaziun d'ir a scola fin al mument ch'els han cumplenì il 20avel onn da vegliadetgna duai vegnir integrada concepziunalmain en il dossier da qualitat "Logopedia".

Custs supplementars organisatorics ed administrativs:

Tras la planisaziun da la purschida en atgna responsabladad per las prestaziuns en il sector dals giuvenils suenter ch'els han terminà l'obligaziun d'ir a scola fin al mument ch'els han cumplenì il 20avel onn da vegliadetgna resultan tscherts custs supplementars organisatorics ed administrativs per il SPC.

Custs en il sector da las logopedas regiunalas:

La direenziun da las logopedas regiunalas tras la gestiun dal SPC è da natira generala e cumpiglia l'entir champ da lur activitad logopedica. Per quest motiv na resultan en quest punct nagins custs supplementars.

Sa basond sin las explicaziuns qua survart sco er sin la decleraziun dals custs supplementars che resultan a chaschun da la sesida dals 13 da zercladur 2013, pon ins partir dal fatg ch'il SPC na basegnia nagins ulteriurs pertschients da plazzas per ademplir las novas incumbensas e per cuvrir ils custs en il sector da la logopedia regiunala. Ma sch'i resultassan l'onn proxim tuttina custs supplementars relevants, po il SPC demussar quels en il rom da l'examinaziun dals pensums per la logopedia regiunala durant l'onn 2014/15 (cf. disposiziun dal departament nr. 548 dals 26 da settember 2012, punct 6 dal conclus).

Per la lavur logopedica cun ils giuvenils èsi da far quint – tenor l'infurmaziun dal SPC – cun custs annuals en la dimensiun d'ina piazza da 50 %.

Suenter avair prendì invista dals documents

dispona il departament d'educaziun, cultura e protecziun da l'ambient:

1. Il servetsch da pedagogia curativa (SPC) vegn designà a partir dal 1. d'avust 2013 sco instituziun da scola speziala "logopedia" ch'è cumpetenta per ils giuvenils suenter ch'els han terminà l'obligaziun d'ir a scola fin al mument ch'els han cumplenì il 20avel onn da vegliadetgna. Ils custs correspundents valan en il quint da gestiun sco imputabels.
2. Il SPC vegn incumbensà d'integrar las novas incumbensas en il dossier da qualidad "Logopedia" e da repassar quest dossier fin la fin da l'onn da scola 2013/14 en col-lavuraziun cun l'uffizi per la scola populara ed il sport.
3. Las logopedas regionalas vegnan autorisadas ed incumbensadas da realisar la purschida da logopedia per ils giuvenils suenter ch'els han terminà l'obligaziun d'ir a scola fin al mument ch'els han cumplenì il 20avel onn da vegliadetgna, e quai en accordanza cun la direcziun dal SPC.
4. Las logopedas regionalas han la cumpetenza da dar directivas professiunalas ed administrativas a las logopedas ed als logopeds da las instituziuns responsablas per la scola.
5. Per ademplir las novas incumbensas stattan a disposiziun al SPC ils 130 perschients da plazzas ch'èn vegnids permiss en total en il rom da la disposiziun dal departament nr. 548 dals 26 da settember 2012 per las logopedas regionalas. Quests pensums ston vegnir examinads durant l'onn da scola 2014/15.
6. La purschida dal SPC concernent la logopedia per ils giuvenils suenter ch'els han terminà l'obligaziun d'ir a scola fin al mument ch'els han cumplenì il 20avel onn da vegliadetgna vegn integrada en l'incarica da prestaziun.
7. Comunicaziun a: fundaziun dal servetsch da pedagogia curativa dal Grischun, dunna lic. iur. Irmgard Camenisch, presidenta, Quaderstrasse 5, 7000 Cuira; servetsch da pedagogia curativa dal Grischun, dunna Angela Hepting, mainagestium, Aquasanastrasse 12, 7000 Cuira; autoritads e direcziuns da scola; uffizi per la scola populara ed il sport; departament d'educaziun, cultura e protecziun da l'ambient.

DEPARTAMENT D'EDUCAZIUN,
CULTURA E PROTECZIUN DA
L'AMBIENT DAL GRISCHUN



Martin Jäger, cusseglier guvernativ